



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir_yimiyim



tir yimiyim

TAPAK 8



BJP-i Bengal election nung takok angutsü: Amit Shah

Cristiano Ronaldo-i UD Almeria nung 25% stake alizükogo



VOL. XXIII ISSUE NO. 135 (ADOK 135) DIMAPUR ROGONÜ (FRIDAY) TSÜKLAI (FEBRUARY) 27, 2026

₹ 5.00

Nagaland nung Congress yangershitsü meranger

Kohima, Tsüklai/February 26 (TYO): Brehostibarnü Chief Organiser, All India Congress Committee (AICC) Seva Dal aser AICC Observer, Lalji Desai-i, tang par party Sangathan Srijan Abhiyan tagitak aliba ya Nagaland nung Congress telok mapang telatet yur melenshitsü nükjidong nung lir, ta ashi.

Congress Bhavan, Kohima nung osangbener senden ka nung jembidang, iba Abhiyan kübok pai organisational exercise reprangba nung Nagaland ya state pongu buba lir, koba ajanga district aser block units nungi tenzuka booth-level lenirtem tashi nungi party workers temi temelenshitsü aser shisatsü agütsüba bendentsü meranger, ta Desai-i ashi.

"Electoral bodu masü organisation ya tongtipangba lir aser iba sentong ya Rahul Gandhi aser Mallikarjun Kharge nati linük tesem ajunga nung party tashi itshitsü atema yanglu," ta pai ashi.

Iba sentong ya Gujarat, Haryana, Uttarakhand, Rajasthan, Punjab, Madhya Pradesh aser Chhattisgarh states tem nung tenzükogo.

Telemtetba agiba nung grassroots workers indang-indanga shilem agidakja Congress party akhi mapang nungi inyaka aruba yimya asendenshitsü teblemba nung iba maparen inyaker, ta Desai-i ashi.

"Onok yangi angatsü atema arua lir. Congress workers atema noklang shilem mapang lir. Nisung mashi kati onok ajurutetsü," ta pai ashi.

"Onok DCC tir tasen shimtsü atema kisüng aruba masü. Onoki district shia lenir inyaksü sempet aliba jangjatsü meranger," ta ashi.

Congress Working Committee nungi züngsemtem densema Madhya Pradesh, Gujarat, Maharashtra aser Delhi nungi lenirtem iba sentong nung shilem agir.

District Congress Committee (DCC) tir tem shimba sülen parnok anogo ter training agitsü. Iba sülen parnok kübok block aser assembly levels nung party structure layers ana amenoktsü asoshi parnok nem mapa nungloktsütsü aser iba sülen village level tashi aotsü, ta Desai-i ashi.

Item inyakyim ajunga anogo 45 tsüngta tembangtsü aser progress report ya AICC organisational department nem March 7 tashinung agütsütsü.

Tang Nagaland nung DCC tir 12 lir. State nung district 17 liaka party structure ya administrative district den sako masü, ta Desai-i jangjatsü.

DCC units timba akumtsü atema Pradesh Congress Committee (PCC) aser AICC külemi telemtetba agitsü ta ashi.

DHE Nagaland-i India Meteorological Department den MoU zülutep



Depratment of Higher Education aser India Meteorological Department tsüngta MoU ka Kohima nung February 26, 2026 nü zülutepdang tangokba noksa ka nung Minister, Temjen Imna Along aser dangartem angur.

Kohima, Tsüklai/February 26 (TYO): Department of Higher Education (DHE), Government of Nagaland-i India Meteorological Department (IMD), Ministry of Earth Sciences, Government of India den Memorandum of Understanding (MoU) zülutepba sentong ka Directorate of Higher Education, Kohima nung February 26, 2026 nü agia liasü.

Iba MoU ya Government of Nagaland-i kanga junga asadanga agizükba lir, koba Temjen Imna Along, Minister, Higher Education & Tourism, Government of Nagaland; Sarita Yadav (IAS), Secretary, Higher & Technical Education; V. Lovitoly Sema, (NCS), Ex-officio Director Higher Education; IMD nungi teshimtet nübu aser department ketdangsürtem lia zülutepa liasü.

Iba MoU nung Government of India-i Mission Mausam Scheme kübok Dimapur Government College, Oriental Colony, Dimapur nung X-Band Polarimetric Doppler Weather Radar (DWR) ka amenoktsü.

Iba yagi tzüngsang-mopung takzüba aser agriculture meteorology nung talisa Nagaland region atema teyari tali agüja nüburtem aser ki o jen kumzüka ayuba aser sentong tajungba yangluba nung yaritsü.

DHE aser IMD lungjemer Urban-Meteorologu aser atmospheric sciences nung angatetba tajungba kumdaktsüba nung rangloktsü aser research asoshi tesem tasen jangjatsü.

Nagaland region nung tzüngsang-mopung tajungba takzüa sangdongba dak sendakba nung 'weather hazards' tajungba

nung angatetba nung yaritsü, ta MoU nung shia lir.

IMD aser DHE külemi anaprong ajangzüktsü asoshi applications tasen yanglutsü.

Iba ya ajanga Nagaland tesem balala nung aliba higher educational institutions nung tesayur aser kaketshir tem tzüngsang-mopung aser climate science nung research, training aser shisatsü lemsatepba maparen inyakba nung maongka adokdaksütsü imlar, ta DHE ketdangsür temi ashi.

Iba MoU ya zülutepba anogo nungi küm 20 asoshi mesüra IMD aser DHE külemi shisa lemsatepa melenshitsü nüngdakba mapang tashi alitsü.

Iba ya Nagaland nung scientific infrastructure tashi itshiba tsütsü tongtipang mera ka lir, ta DHE ketdangsür temi ashi.

Salary budget head mechi tesayur 2,293 longkak ait tenzükogo

Kohima, Tsüklai/February 26 (TYO): Nagaland Government Teachers' Association (2010 & 2013 batches) züngsem 2,293-i parnok indang itasen ya State indang non-plan expenditure head kübok inokjang ta takhangba agüja Hokulbarnü nungi mezungbuba phase yimjung nung democratic yimya amshia longkak ait tenzükogo.

Longkak aita aliba tesayurtem ya Directorate of School Education (DoSE) kima adenshia banners aser placards nung "Terata nung tetoktsü, onok itasen state non-plan budget nung inokang", "Budget memetongshira, classroom nung mesayutsü", "Mainstreamed teachers 2293 nem obendang shidak agüjang - Taa sako agüjang" ta zülua amer liasü.

Osangbener den jembidang, Cabinet-i agizükba sülen April 21, 2022 nungi tenzuka State Education Cadre nung aniochtsü September 2, 2022 nung totuyuba agütsü, ajisüaka küm asem dak tema liyonga arudang parnok indang itasen ya regular state cadre employees ama tapet State Account Head nungi masü

saka Centrally Sponsored Schemes (CSS) nungi agütsür, ta parnoki ashi.

Parnok indang itasen ya State indang non-development expenditure kübok inoktsü asoshi aiben tezüluba nung agüja mepishia aru, ta parnoki ashi. Telangzüba tajung mongutet nung, tesayur temi February 16 nü iba ken o anogo tenet tsüngta bentetjang ta takhangba agütsü.

Telemtetba mali iba anogo süyiba sülen züngsem temi Mongulbar aser Bodhbarnü pendown strike liasü. Iba ken o tangatetep kati maruteti lir asünungji, parnoki akangba mataloktsü tashi yimjung aser democratic yimya nung longkak aitba tali tesashiba akumer, ta ashi.

Kasa mapang School Education Department-i Sarva Shiksha Abhiyan (SSA) aser Rashtriya Madhyamik Shiksha Abhiyan (RMSA) kübok shimba tesayur temi longkak aitba injang jangjashija sangdong ka agütsüogo.

Department ajanga ashiba agi, 2010 aser 2013 batch tesayur tem ya mezungbo SSA aser

RMSA indang CSS kübok posts creation sür shimoka liasü aser parnok indang itasen ya Government of India-i agütsüba sen nungi agüja aru. Ajisüaka recruitment advertisements aser appointment orders nung appointments ya SSA/RMSA CSS terms nung lir ta tejanga magütsü, anungji tesayur temi State School Education Cadre nung aniochtsü akhang.

Iba recruitment process nung open advertisement liasü aser Personnel & Administrative Reforms (P&AR) aser Finance Departments aser State Cabinet nungi temelaba ngur agi asünung, Nagaland School Education Service Rules, 2017 kübok criteria temsüa aliba tesayur 2,293 ya September 2, 2022 nü State Cadre nung anioch.

Parnok tesayurtem ya 7th Revision of Pay (ROP) den scale pay aser danga tangutsütem agütsür aser regular State Government employees ama sorkari kasa totuyuba agüja aliba kübok lir, ta Department-i ashi.

Non-Plan Budget kübok State Account Head nungi itasen agütsütsü atema takhangba agüja

tim ketdangsür den jembishinüa aruaka, Budget Head of Account nungi parnok itasen agütsütsü ya State employees mulung masü, ta ashi.

Adviser, School education den Samagra Shiksha, School Education Department aser Finance Department nungi ketdangsürtem-i item tesayur nungi teshimtet nisungtem den June 3 nü senden mena parnoki akhangba indang jembia liasü, ta Department-i metetdaksü.

Osangbener den jembidang, tesayurtem ya tetenzük nungi regular appointees lir, ta NGTA Dimapur Unit tir Alemkala-i ashi.

"Onok ya backdoor appointees masü saka formal recruitment process shidak ajang - fiorms agütsü, written examination aser viva voice agütsü aser tajungtiba nung ajemdaker results sangdong. Küm 13 dak tema onok state cadre tesayur den sako amshitsü asoshi rara arur. Onok itasen ya tang CSS kübok agütsür, aser iba ya State indang non-plan budget dangi melentsüla," ta ashi.

State Cabinet-i October 2018

nung tesayur 2,293 ya State Education Cadre nung aniochtsü telemtetba agi. Nüngdakba criteria ajak abensaba sülen parnok ya April 1, 2022 nungi cadre nung anioch, ta NGTA Central Unit tir Peihau Irangbe-i ashi.

"Onoki akhangba tejangja lir - onoki akhangba sorkari magizük tashi onoki iba longkak maneni aitsü," ta Irangbe-i ashi.

Department mashi nung state cadre employees tem parnok itasen State indang non-development head nungi agütsür, ta paisa ashi.

"CSS kübok asünung, Centre nungi sen menur agütsür ta department-i ashir, aser iba yongji onok indang itasen mapang ka-kabo ita aika menur agütsür. Aser post tazung aliba advertise asüba mapang department kübok regular posts liasü, saka department-i onok indang appointment letters nung ang 'under CSS scheme' ta inoktsü. Iba yongji onoki onok indang itasen ya memonui State non-plan head küboki aitdaksüner," ta Irangbe-isa ashi.

NCS & NSS ketdangsürtem anogo ana training tenzükogo



Dimapur, Tsüklai/February 26 (TYO): 'Ethics and Values in Public Governance' dak sendakba nung senior level sorkar ketdangsürtem atema anogo ana atema training sentong ka February 26 nü ATI, Kohima nung tenzükogo.

Iba training nung Nagaland sorkar kübok Secretary & Additional Secretary rank nung aliba NCS & NSS ketdangsür 25-i shilem agidar. Training ya Department of Personnel & Administrative Reforms, Government of Nagaland aser Institute of Secretariat Training and Management (ISTM), New Delhi na longjemer agidar.

Training lapokba sentong ya Bendanglila, NCS, Additional Director (Admin) ATI &

Additional Secretary to the Government of Nagaland lenisüba nung agi. Training nung agitsü aliba course indang shisalen sayur Inderjeet Mittal, Director (Retd), GoI & Guest Faculty, ISTM, New Delhi-i rasa ashi.

Training mapang Ethical Governance, Care for and integration with self, others aser environment & Ethical Dilema onüktem ayimjema agitsü.

Sentong nungsa Director General, ATI, Additional Chief Secretary (Agriculture) and Agricultural Production Commissioner V. Shashank Shekhar, IAS-i o tatsüka jembia liasü. Pai, Officer Trainees tem dang tangar asoshi tatishitsü tajung toktsütsü ayongzük,

kechiyong parnoki state srokar kübok khuret aika bena lir, ta ashi.

Maneni paisa, sorkar kübok tongtibang mapa bena alirtem kaka ama parnok khuret aser tinyaktsü nenshia metetdaksü, lokti-i ajangshiba tebilemstütem bentettsü asoshi lenmang bushitsü aser nüburtem ajangzükdaksütsü atema sorkar machinery tem kanga junga inyaksangshidaksütsü asoshi jenjang tapet agitsü ajungshia liasü.

Shekhar-i, lateta aliba sorkar inyakyim nungi pila aoba ajanga mepetmesü adoka sorkar fund tem tatongtsüpurtem tonga moteter, koba temzüing ozüing kübok dang aibelen ka masü saka iba ya loktilibaren anema lir, ta ashi.

RTO Wokha-i two-wheeler taxi permits atema tejangrartem jaok

Dimapur, Tsüklai/February 26 (TYO): Regional Transport Authority (RTO), Wokha-i sangdong ka ajanga, Wokha district kübok temsüa aliba applicant tem Two-Wheeler Taxi Permits atema jaokogo. Taxi Permits atema Regional Transport Authority, Wokha-i temelaba agütsüogo.

Applicants tem ya lisopurtem aser Wokha district nung permanent alirtem asütsüla, parnok ket nung Aadhaar aser Scheduled Tribe certificates alitsüla, two-wheeler driving license tejangja aser ken o dak sendaka aliba ketdangsürtemi agütsüba unemployment certificate bena alitsüla.

Applicants tem ya application benokba mapang arishi küm 20 nungi 40 tsünga

alirtem asütsüla.

Application form tem February 24 nü nungi Wokha Deputy Commissioner office nungi agütsü tenzükogo aser form benoktsü atema tatembangbuba anogoji March 27, 2026 asütsü.

Applications benokba mapang kuli kaket mabensa alirtem magizüktsü. Teshimtetba candidate tem two-wheeler aniba tendangtsü aser interview-a agitsü aser iba atema osang tejangja mapang tatong nung metetdaksütsü.

Terms aser conditions nung two-wheeler ya brand new asütsüla aser engine capacity ji 125 cc mesüra iba dang tema asütsüla. Permit agütsüba ya transfer mesütettsü aser küm pongu tashi amshiba sülen

temzüing ozüing dak ajemdaker ano küm pongu atema renew sütettsü, koba tangari anishitsü makoktsü, ta shia lir.

Taxi anirtem helmet yellow aser half-vest yellow asemtsüla aser anaprongla tesülen "TAXI" ta jangja jangja zülur alitsüla. Motor Vehicles Act, 1988 kübok Section 129 nung shia aliba ama taxi anir aser tesülen amener anaprongla mapang ajak nung ISI-certified helmet asemtsüla aser tesülen ka dang amentsü melatsü.

Two-wheeler taxi tem ya Wokha jila nung anishitsü melatsü aser RTO-i lateta toktsüba fare dang agitsüla. Aibelenba kar danga ngutetra ketdangsürtemi temzüing ozüing dak ajemdaker permit thitsütsü akok.



Dimapur, February 26: Indian National Trust for Art and Cultural Heritage (INTACH) Nagaland Chapter-i ayongzükba mezüingbuba North East Festival of Rice -Grans of Heritage, Agri Expo ground nung Bresthibarnü tenzükogo. Iba benjung ya Advisor for Agriculture, Mhathung Yanthan-i lapoktsü. Pai iba sentong ya otsüsütsüka aser iba tesem atema kanga tongtibang lir ta ashi. Paisa, Department of Agriculture, ICAR Research Complex for North Eastern Hill Region (Umiyam and Jharnapani centres), aser North East Zone Cultural Centre den longjemer iba benjung ayongzükba atema INTACH Nagaland Chapter nem tenüngsang agütsü.

DoSE-i rijutem nem metetdaksü

Dimapur, Tsüklai/February 26 (TYO): Directorate of School Education-i sangdong ka ajanga school tekolak (jurila aser sorkar school) ajak dang Aadhaar Card maliba ajanga

kaketshirtem admission agitsü atema menokdangtsüla ta metetdaksüogo.

Ken o dak sendaka alir ajak dang iba tetuyuba sülen tashi anga anidaksü metetdaksüogo.

Niuland DPDB senden menogo



DPDB Niuland Vice Chairman, Sara S Jamir lenisüba nung senden aliba noksa nung angur.

Dimapur, Tsüklai/February 26 (TYO): Deputy Commisioner & District Planning and Development Board (DPDB) Niuland Vice Chairman, Sara S Jamir lenisüba nung February 26 nü DC Conference Hall Niuland nung DPDB senden menogo.

Senden nung Year of Plantation atema District Level Committee tentetja liasü. Iba committee ya Nuhuta Tunyi, SDO (C) Kuhuboto lenisüba nung inyaksangshitsü aser District Agriculture Officer Thepusa Nakhro member secretary asütsü aser PHE & PWD densema Agri. aser Allied Department ketdangsürtem ajak züingsem asütsü.

Temetettsü kaji taoba DPDB senden nung 2026 küm ya süngtong atemba küm asütsü ta sangdonga liasü.

Kasa mapang nung Androit Society Kuhuboto tatong tir Jenifer-i, Society inyakyim indang osang tejangja agütsü aser iba sülen Board

züingsemtemi Androit Society Kuhuboto renew sütsütsü agizüka liasü.

Senden nungsa Water Resource Department (WRD) nungi Er. Karipong Walling, EE & Er. Lhokashe Swu, SDO nati department inyakyim aser tang district nung mapa balala benoker inyaka aliba indang power point presentation agüja liasü.

WRD-i presentation tajung agütsüba atema tenüngsang agüja jembiba mapang DC-isa, ketdangsürtem dang seminar aser workshop balala ajanga scheme aser project balala indang nüburtem nem tangazükba agütsütsü mepeshia liasü.

Niuland jila nung tzü bangdaka ayuba tebilemstü indang jembiba mapang DC-i, Niuland Town Council Chairman, V Samuel Holo aser ADC Niuland, S Athsangla na dang iba tebilemstü bentettsü atema Water Resource Dept. den angatettepa inyaktsü mepeshia metetdaksüogo.

'Woven Together By His Hands' kaket sayaogo



Kohima, Tsüklai/February 26 (TYO): Selvinu Khanyo Magh-i züluba 'Woven Together By His Hands' kaket NRA Conference Hall, Kohima nung February 24 nü sayaogo. Iba kaket ya 6th Finger Publishers-i publish süa liasü.

Iba kaket ya temeim, kibong akümba aser bendanga agütsüba indang lir.

Kaket ya alakteta jaoker ama Director, Directorate of Youth Resources & Sports Kethosituo Sekhose-i sayaja liasü.

Kaket zülutsü tejangraba aser nukla tajung aliba atema Sekhose-i kaket zülur nem tenüngsang agütsü.

Paisa, kaket azüingba yimya

dangi meyipa aotsü koda tongtibang iba indang lemsatempa liasü.

Pai ashiba agi, Chief Minister Dr. Neiphu Rio lenisüba nung sorkari sempet tajung aketba aser wadang balala nung tejangraba aliba lanurtem ajungkettsü tejangraba alir.

Sentong nungsa 6th Finger Publishers Editor -In-Chief, Sentinaro Longkumer-i publisher ama o tatsüka jemi aser RBCK Youth Pastor, Zakevi Kesen-i Tsüngrem temaotsü meshizüka sarasadema liasü.

Kaket sayaba sentong ya Baptist High, Kohima Vice Principal, Wetu Losou lenisüba nung agia liasü.



February 26, 2026 nü Yirusalem nung Ato kilonser, Narendra Modi-i technology exhibition ka semdangba mapang tangokba noksa nung angur. Ajichilen Israel Ato kilonser, Benjamin Netanyahu-a angur.

India aser Israel nati tezüngzüktep 16 agiogo

New Delhi/Jerusalem, Tsüklai/ February 26 (Agencies): Brihostibarnü Jerusalem nung Ato kilonser, Narendra Modi aser Israel Ato kilonser Benjamin Netanyahu na senden mena linük ana tsüingda tesendaktep tajungba akümtsü atema onük aika nung o lemtepa sülen linük ana tsüingda tezüngzüktep 16 agiogo.

Lenir anati linük ana tsüingda defence, shishilembaba, technology aser aluyimba külemi West Asia tensa dak sendakba nung tebilemba lemsatep.

Lenir ana leniba nung ketdangsertem senden amenba mapang nung parnoki talisa defence aser security tsütsü taliba amalitepa inyaksü atema jembii.

Lenirtemisa linük ana tsüingda intelligence lemsatepba, kiralongra anema raraba aser defence osettsüset yangluba nung ano taliba amalitepa inyaksü jembii.

Tesüsa linük anati rongsenkettzüng aser security densema sector balala dak sendakba tezüngzüktep agi, ta ketdangsertemi metetdaksü.

Senden nungjisa shishilembaba tsütsü Middle East aser Europe den India sendaktepsü atema India-Middle East-Europe Economic Corridor (IMEC) project atema jembii.

Lenirtemi I2U2 grouping atema-a jembii. Iba telok nung züingsem linüktemji India, Israel, United Arab Emirates aser United States lir. Iba tentet ya chiyungtsü security, clean energy, technology aser logistics tsütsü amalitepa inyaksü atema lir.

Iba dak alia lenirtemi tang West Asia nung tensa mejungi aliba atema jembii. Parnoki region nung yimjung alitsü atema jembiba den külemi security dak sendakba tebilemtsü lemsatep.

Bodhbarnü Ato kilonser Modi-i, pai Israel semdangba ajanga linük ana tsüingda tesendaktep tajungba akümtsü aser asalentong tsütsü nükjidong tasen ayutsü, ta metetdakja liasü.

Ato kilonser Modi-i Israel Parliament 'Knesset' nunga jembitsü. Israel-i apusoa maodang Modi-i, pai Israel Ato kilonser, Netanyahu ajurua linük ana tsüingda lenla balala nung amalitepa inyakba jenjang tashi itshitsü aser regional den International onüktem nung o lemteptsü yongyar, ta metetdakja liasü.

2017 küm mezüing pai Israel semdangba ajanga linük ana tsüingda defence, aluyimba aser water management sectors nung maongka aika lapoka liasü.

Bodhbarnü pa Tel Aviv nung aliba airport tonga aoba mapang nung Israel Ato kilonser Netanyahu aser pa kinüngtsü, Sara Netanyahu nati pa agizüka liasü.

Pa anenzükba hotel nung India nungertemia pa agizüka liasü.

PM Modi-i tetsürtem atema HPV vaccination drive tenzüksütsü

New Delhi, February 26 (Agencies): Honibarnü (February 28) Ato kilonser Narendra Modi-i arrshi küm 14 tetsürtem atema Human Papillomavirus (HPV) vaccination drive tenzüksütsü, ta Union Health Ministry-i metetdaksü.

Rajasthan kübok Ajmer nungi tenzüksüba sentong nungji states aser Union territories nungi ketdangsertem video conferencing ajanga adentsü.

Health Ministry-i sangdong ka ajanga, "Tetsürtem rongnung cervix cancer nokdangtsü atema vaccination ajungkettsütsü. Arrshi küm 14 pur tetsürtem ajak atema HPV vaccination campaign ji

February 28 nü anüingdang 11:30 ako nung tenzüksütsü. Rajasthan kübok Ajmer yimti nungi iba campaign tenzüksütsü atema Ato kilonseri melungogo," ta metetdaksü.

States aser UTs ajak nungi ketdangsertema peipei National Informatics Centre (NIC) units nungi iba sentong nung adentsü.

States aser union territories headquarters nung Chief minister tem, tongti ketdangsertem, state health minister tem aser health ketdangsertem iba sentong nung adentsü imlar, ta Health ministry-isa metetdaksü.

Health ministry-i, iba campaign tenzükba sülen ita asem tsüingda arrshi küm 15 ajunger tetsürtema iba vaccine

agitsü temsüa lir, ta metetdaksü. Iba campaign kübok Gardasil-4 mozüji dose kaka agütsütsü, aser iba campaign ya linük tesem ajaklen sorkar health centres nung agitsü.

Vaccine agitsü mesüra magitsüji pei melung asütsü aser iba vaccine agitsü atema tsürabur mesüra guardian dang tama asüingdangtsü.

Ita asem tashi campaign agiba mapang nung akokba tashi nisung teimtiba ayimjemtsü atema HPV vaccine ji anogo shia agütsütsü.

Ita asem tembangba sülena routine immunization anogotem nung maneni health facilities nung iba vaccine agütsütsü, ta health ministry nung ketdangsertemisa metetdaksü.

BJP-i Bengal election nung takok angutsü: Amit Shah

New Delhi, February 26 (Agencies): Brihostibarnü Union Home Minister Amit Shah-i, West Bengal assembly election nung BJP-i takok angutsü aser sorkar akümba sülen ozüing alema arua alir bendanger ajak meindoktsü, ta metetdaksü.

West Bengal den arrtsülen Bihar kübok Araria district nung Sashastra Seema Bal sentong ka nung jembidang Amit Shah-i, "Kobi melii West Bengal nung election agitsü.

BJP-i takok angutsü ta ni amanger. Sorkar tasen akümba sülen onoki ozüing alema arua alir bendanger ajak meindoktsü," ta metetdaksü.

"Bendangertem meindokba maparenji Bihar nung, talisa Seemanchal region nungi tenzüksütsü. Iba kasa tebilemtsü onük nung ajemdaker yaküm onoki yangi (Bihar) assembly election nung takok tulu ngua liasü. Opposition-i onoki benokba onüktem aija liasü, saka onoki takok angu," ta

paisa metetdaksü.

"Ozüing alema bendangertem arua aliba ya linük security atema lendong. Bendangertem ajanga litsü melenshütsür, ration chitsür aser asen nüburtem atema agütsüba maongka ajak agitsür," ta Home Minister-isa metetdaksü.

"Bendangertem ajanga amokmeren tulutiba aliba state temji Bihar, Jharkhand, West Bengal aser Assam state tem lir," ta paisa metetdaksü.



Ambala, February 26, 2026: Global AI summit nung longkak aitba ken o nung pua alir Indian Youth Congress (IYC) nung inyakerkem medical check-up atema Ambala nung aliba hospital kati anir aodang tangokba noksa nung angur.

FORM NO. 14
[Regulation 33 (2) rebrangang]

**OFFICE OF THE RECOVERY OFFICER - III
DEBTS RECOVERY TRIBUNAL GUWAHATI**
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati-781007 (Assam)

DEMAND NOTICE
RECOVERY OF DEBTS & BANKRUPTCY ACT, 1993 NUNG SECTIONS 25 NUNGI
28 TASHI ASER INCOME TAX ACT, 1961 NUNG SECOND SCHEDULE KÜBOK
RULE 2 NUNG AJEMDAKER DEMAND NOTICE AGÜTSÜR
RC/85/2025
STATE BANK OF INDIA
- Versus -
M/S NYOTSO UNIT AND ANOTHER

To,
(CD 1) M/s Nyotso Unit
Represented By Mr. Kewekhabe Therie, R/O House No. 1, Sector-A, Aoyimti
Village, Dimapur, Nagaland-797115
(Cd 2) Kewekhabe Therie
Son of Mr. Lebou Therie, R/O PO Pfutsero Ketuopa Colony, Pfutsero TC, Phak, Nagaland
-797107
OA/414/2023 nung DEBTS RECOVERY TRIBUNAL GUWAHATI Presiding Officer-i
tuyuba nung Recovery Certificate nung aliba ama na (Jointly and severally/Fully/
Limited) anema sentsüh Rs. 66,67,934.97/- (Rupees Sixty Six Lakhs Sixty Seven
Thousands Nine Hundred Thirty Four And Paise Ninety Seven Only) den pendentelite
aser 28.10.2023 anogo nungi tenzükba sentsüh mouma tashi future interest @ 10.50%
Compound Interest Monthly aser costs Rs. 69,005 (Rupees Sixty Nine Thousands Five
Only) lir.

1. Recovery Certificate nung aliba sentsüh:	Rs. 66,67,934.97
2. 28.10.2023 nungi 31.07.2025 tashi interests @ 10.50%	Rs. 13,48,403.34
3. Costs	Rs. 69,005.00
Total :-	Rs. 81,40,863.31
Recovery (-)	Rs. 00.00
	Rs. 81,40,863.31

Osangkaketem nung iba sangdong agütsüba sülen anogo 15 tsüingda tekalen shia aliba
sentsüh ajak agüjang ta tuyur, mesüra sentsüh alangzüksü atema Recovery of Debts
Due to Banks & Financial Institutions Act, 1993 aser Rules nung aliba ama inyaksü.

3. Taruba ken o angadangba anogo matongdangsa affidavit ka nung nü kiojen sangdongang
ta tuyur.

4. Maneni ken o angadangtsü atema 12.03.2026 anogo nung anepdang 10:30 ako tashi
nung tsüinglanglen sign süa alir dangi arung ta nü dang tuyur.

5. Temalen shia aliba sentsüh dak alia nai item ya-a agütsütsüsa akümtsü :
(a) Iba certificate/execution indang notice agütsüba mapang nungi tenzükba interests.
(b) Iba notice aser warrant den külemi sentsüh alangzüksü atema inyaksangshidang
indokba costs, charges aser expenses ajak.

22.12.2025 anogo nung tsüinglanglen kü meyongnem aser iba Tribunal seal agütsür.

Recovery Officer II
Debts Recovery Tribunal, Guwahati

- ALI AYOKER -

* Prime land for Urgent Sale ! * Naga united village
* 70,000 sq ft. * Plain stable high land
With concrete boundary walls and natural drainage.
* Near the main road * Any plot size available
@ 430/- sq. ft (Negotiable & No broker)
Contact : 7628822085 / 9366156425



TIR YIMYIM YIMOBILEM (EDITRIAL)

DIMAPUR FRIDAY, FEBRUARY(TSÜKLAI) 27, 2026

Opposition lidaktsünüali !

Nagaland nung Regional party ana aliba agi ka kümer tang mezüngbuba tatar senden March 2 nungi amentsü sentong aliba ya kasa government mapang mena aruba tatar sendentem dang nungibo tongtibangba ka asütsü, kechiyong tatar ajak government nung dena liaka Nagaland nung Naga nungertemi akümba 'Regional party' bo ka dang asütsü. Ano, tongtibang onük ka benoka jembitsü alibaji Frontier Nagaland Territory Authority (FNFTA) akümba tangatettep onük ya mapa kuma aotsü atema ken o lemtepbba mapang agitsü alibaji asütsü. Aji oda, FNFTA Secretariat nung inyaksü purtem shima parnok nem mapa lemstsütsü aser ita sen agütsütsüsubaji Nagaland state mapa asünungbo, mapa tila agi tulu kuma inyaksatsüsubajia ana nung dang lir. Anungji, tatar senden nung item ken o benoka jembiba agi ken o tazü agi tamen kuma nübortemia angatetsüsa tatartemi jembiba angatsü yongyasete atar. Atangji, Nagaland tatar senden nungbo Regional party külen aser National party külen ta ser o toktepa jembitsüsubaji masü, kechiyong tatar ajak government nung lir, opposition nung azüjang kata mali, anungji kati ka mapa aitsütepa jembitsüsubaji masü saka kati ka sangtepa jembitsüsa dang adoktsü, anungji nübortemi government tamakok indangbo mangutsü aser mangashitsü. Democracy nung tamakok-ji yamaji tenzüker. Ano, Nagaland ama state nung nübortem amajok nung mangmangdakja anishibaji "Regional" aser "National" ta asüba ya lir. Aji oda, Regional telokibo Naga nung yimten temeten aser terenlok indang jembir aser National telokibo Naga nung yimten temeten pu masemer ta yimten lenirtemi, talisa election mapang nung jembiba angashir. Ajisüaka, Nagaland nung Regional teloka aser National teloka, parnok ajakji election nung tokteptsü tenüng agütsüsdangyongi ' Ni India senso tajung ka aser India linük wazüka aser kumzuka ayutsüsubaji kü mapa asütsü,' ta nangzüker külenang tokteper aser election nung adoker yimsütsü metenzükdanga, linük temzüng kübok tashi angaa alitsü asoshi tenangzükbba agir külenang mapa tenzüker. Ibaji asenok India nung passport aser ID amer Naga yimten nüchiso indang jembir amai lir. Aji oda, Naga nung Regional party o Indian National party ajakji India temzüng kübok tashi angaa alitsü asoshi tenangzükbba agir yimten nung shilem agirtem asünungji, Naga Regional party purtemi Naga nungertem dang Naga yimten nüchiso asoshi raratsür telok amaibo mesayutsüla aser National party purtemia Naga yimten tebilemstsü kokteta jembitsütsü asoshi election nung tokteper amaibo mejembitsüla. Ajisüaka, Nagaland tatar senden nung India temzüng kübok nübortemi shimtetba yimsüsür ka ama indangindanga nübortem nungdak aser parnok taginübatem reprangteta jembitsü aser inyaksütsü bilema shilem agitsüsubajiang ochi mapa asütsü. Aji oda, Nagaland tatar senden nung Naga yimten nüchiso angutsüba indang jembiba ya mazü, kechiyong Naga yimten nüchiso angutsüba dak mamangba agi Nagaland state ya aküm, anungji Naga yimten nüchiso angutsüba dak teimla aser takoktsü lira, Nagaland tatar senden ya anenadoktsüla aser Naga yimten temeten jenjang ka indang jembitsüla. Atangji, item ama Naga yimten dak aketba ken o aser terenlok mapa takok ngua meinyaktetbatem kuli bushia tatar senden nung 'Ruling' aser "opposition" na tsüngda ken o taret benoka jembiteptsüsubajibo kanga tapet, jangratemtsüka aser tajangzük aketba mapa ka süla. Ajisüaka, opposition maliba tatar senden nung nübortem nungdakba indang kechi jembitsü ? Iba ama opposition maliba tatar senden nungbo shitakba nübortem ajangzüktsü metetnüa asüngdangbatembo kangabo malitsü saka kasa government nung adenertem dang asünungji, tangatettep nung tenüng agi tasüngdangba kar asüngdangtsü aser aji yaritepa telangzüba yanglur langzüksü. Itemji tema nungbo junger amai saka telong nungbo alima aser nübortem dang masü saka teti atema peisasa ashioksüba mapa ka asütsü. Aji oda, asen lima ya külemi tangatettep nung metetsümonga raksaba lima ka masü saka tangatetba nung tai dang tai aser shitak dang shitak ta shia yangluba lima ka asütsüsa, tang amai masü saka teti Nagaland tatar senden nung opposition kanga tashi itta lidaktsüner.

OLEMSABANG

AIATAI

~ M.Meren, Ex. Pastor Ungma.

(Yashi adok nungi...)

Aolima tekong tenem teret lima kecha matoker aser idakji aliba Arogotem jenti sensak tia nung alir saka ajakji arema alir saka Kanan lima ama Dimapur nung akaba Arogotem nung kecha nunga mataloktangba tatalokba mapatem agi asünger ajakji Dimapur lima ataloker. Ngashi ayoksangi ajak loka bener aoba ama ter shilem bendena akaba Tzünü shi nguseta pei pei yari nguzüka bener senshiba ama Tsüngremer senpong nungi pei pei yari semer senshira aiataiji idak nungjagi majuruli ma?. Ajak dang tetsübuttsü tulutiba osang aser ajia Dimapur lima nung ola angashir, aser aji küm 35 terok tashi shibanga akaba Yi ayoktsü lapokdi ta jembibaji lir, Shibanga akaba mapang nunga mayimjen tesüngmangtsü Dimapur nungbo ataloka aru, süra satem satema lapok nungbo kechi komaka ataloktsü ta bilemer? Yi meshibangdang Dimapur tia bilemdangang, kinük-kisang ajak nung yi menoker agi zünger mezüngdangma liasü, Sector ajak nung yi menemba agi teni ajak keraka menema jaja, iba mapang nungjibo nisung kar dak alaka majemer maliasü, iba mapang nungjibo lenjang nung indangindanga jajar aikabo majuru, Arogo tenzükertema aikasa marok nungi jenboa mali asü, tanü tia nung Dimapur kisung nung asüyonga yi lapokdi ta bilemteter süra akidang mapangtang nungi ter anaben agi tanü tiaji tamajungba akümtsü ta mebilemteter no?. Mungdang aser Arogo tenzükeri lumia sarasadema akangba Chief Ministter shibai aji angateta aser Tsüngrem tsüsuba nung NLTP ACT Nagaland nung renemtsüogo pa taküm lia tanaben shilua molumi kikümbang lapokdi ta atongtetbaji ashiko Dimapur memenue AIATAI LIMA akümtsü nükladang angurani, ni ya zuludang Dimapur nung Tata ka nung nisung pungu yi agi jungjunga meseba jemer Tataji anir aodang mine Road toktsür tangar kidangi atubaji yi jagi aniba masü no? yi lenmangbo mine Roadji masü Shio amai longren longpang nung dang sensürago, akidang Russia lima nunga kanga asükerji ta ser yi pushiteta jem-meso, iba sülenjibo Russia lima nung yimden, loktiliba, kibung ajak nung teraksa adok, lanur ajunga amai süma, Japan war dang nungi timba asü, Europe lima ajunga dang nungi Russia nung 5 ben agi timba jemseta asü aser iba nungji tetsüri asemen agi tali ajem nung jemseta asürtemji tetsür timba asüba atalok. Russia Presiden Gorbochei ozüng tesashi agi alentsü merang saka tashi manga ajem nung 1987 mapang nung Million asem jemseta asüba pushitet. saka kodang Dimapur nung Yiji lapokdir anogo shia yamaji atalokba agi Dimapur asüngtsü nukladang angurani. idangjibo Dimapur limaji molumi punlang asütsü aser perokshia aliba yimsüngtem nung molumi milak tesashiji juketa atutsü aser idakji Khristan State ajak rongseptsü aser ibaji Naga lima asoshi AIATAI asütsü.

Arogoi küm 180 jungnüa Tenla kidang nungi yi nungi pila liang, mim mozü nungi pila liang ta sayutsüngia aruogo, ochi shia liang ta sayutsüngia aruogo saka alima nung ochi angutsü saka kumaogo, yimtong nung ochi laoadokaogo, nüktabangta nungi pila liang ta Tenlakidang nungi shijen shia aruogo saka tangbo tetsür kija senzü majung pur oa raksatsür aser tepseter, saka ano tetsürtemia pei miim oset sayua yimtong nung odia senzüteper ibaji ajanga alima nung shi jangraba temai adoker. Anungji tanü putu nung Arogotemi inyaksim tasen ka agi Arogo nüpurtem anir arutsü lenmang tasen ka pushitsüla, tsürabur putu inyaksim nung tentetba yimya tejen beshia tanü putu tasen nung beshiba agi joko alimai aji masener. America nung Pastori sermonji alima ainba yari mejenbira Arogo membentemjagi iba Arogoji toktsür tanga Arogo nung oa atener, aji oda nüpurtem sentepi marunüsubaji sermon tejen tejen lephsia jembibaji manganer alitsü. Anungji tanü putu nung Arogo up-date süa alitsü kanga nungdaka kumaogo.

Hoi tanü lanu putu noklang nung 90 percent Laishirtemi Arogo aser loktiliba balala anishir saka item jagi tang tashi teka matenba tetezüa memetetser kodaser lokti anishir? Nisung kar dak mojingi teka maloktsüra iba nisungbaji asütsüsubasa, arishi maketertem dak tang mojingi teka maloktsür, ano tanur shiba dak kanga omseterji ta ser iba japaso dak tetsüi pei tejimi maloktsür aser kodang tetsüi pei chir kanga omseter ta ser tetsüi pei tejimi maloktsüdir par japasoji atakatem kaotsü, anungji tetsüi melamela pei tejimi pei chir dak memaloktsür, anungji lokdi nung nokdakertemi teka matenba aser maloktsüba ana yabo metetdangma. Kodang nisung anati ken tajung ka tendir, idangji mendenbubai ken kanga junga tenaogo anungji asenok ajaki teka maloktsüdi ta ashir, maloktsüsubaji atakatem, aser nisung ka kodang maksü mapa inyaka ngudir idangji teka malokja metizüktsüsubaji lir, anungji teka matena agizükdi ta shiangma. Mesüra teka matendi ta shiangma, kechiba teka maloktsüdi ta ashir? Aji atakatem o tulu lir, kari kar dak teka maloktsüra ken o tulu, kü dak teka maloktsütsüsa ni kechi maksü mapa inyaka ta ken o akatsü, anungji lokdi nung nokdakertemi teka maloktsüba o teka matenba anaji mebendang tebenshima, kenübo iba o jagi ken o tulu menatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

AICU-i NE India nung yimsü temeden kümzüksü mepishir



February 20-22, 2026 anogotem nung Arunachal Pradesh yimtiba, Itanagar nung All India Catholic Union (AICU) Working Committee senden tatembangbuba nung tangokba noksa nung angur. Iba senden ya Arunachal Pradesh Catholic Association-i ayongzuka liasü.

Itanagar, February 26, 2026 (Agencies): All India Catholic Union (AICU)-i India sorkar dang northeast nung aliba state tem nung yimsü temeden kümzüksü atema inyadaksüner, kechiyong loktiliba nung tensa tamajungba dang akümba ajanga Khristantem mejungi kongshir, ta metetdaksü.

AICU-i Centre sorkar aser state sorkartem dang linük temzung kübok Khristantem densema minorities temeden atema inyadaksüner, ta mepishi.

Talisa Arunachal Pradesh nung anti conversion ozüing 'Arunachal Pradesh Freedom of Religion Act of 1978' benoktsü atema inyaksangshidar. Iba ozüing kübok kangshia, ashikülak mesüra mesüzüka tamangba yimsü meyipdaksüba nokdang. Arunachal nung iba ozüing ya tesüiba küm aika mebenoki liasü, ajisüaka iba ozüing asentenshir benoktsü atema inyaksangshida ajanga Khristan lenirtem shisabulu tenzükogo.

Iba ozüing kübok teratet tejangja maliba ajanga aika ratamatadaksütsü aser Baptiba densema Arogo maparen aika kongshitsü, ta parnoki metetdaksü.

Arunachal yimtiba, Itanagar nung Working Committee senden anogo asemnü tashi amenba sülen AICU-i sangdong ka ajanga, iba ozüing kübok teratetba tejangja maliba ajanga legal tsütsülen nungi Arogo kongshitsüa akok, ta metetdaksü.

Nütsüing million 1.6 aliba Arunachal nung nütsüing shilem 30 shi Khristantem lir. Tang tashi nungbo Arunachal nung yimsü nung ajemdaker rara adokba osangbo mali, ajisüaka iba ozüing teratet tejangja makai iba ozüing benoktsü, aser ibaji ajanga tensa raksatsüa

akok, ta Arogo nung lenirtemi metetdaksü.

AICU otongdar, John Dayal-i, northeast nung aliba state aika nung ozüing balala ajanga Khristantem kongshir, loktiliba nungi sendoker aser tashiyim amshiba tatalokbatem lir, ta shia pai sorkar ketdangsertem dang yimsü balala amanger ajak tesünep nung alitsü aser yimsü temeden kümzüksü atema inyadaksüner, ta mepishi.

AICU-isa Manipur nung maneni lisopur telok balala-Kuki-Zo Khristantem aser Meitei Hindu nungertem tsüingda raraba atema tebilemtsü akaba lemsatop.

Manipur nung rara tenzükba sülen nisung 250 dak tali süogo, nisung 60,000 jenshiogo aser Tenla ki 400 dak tali raksatsüogo.

State yimtiba, Imphal nung Arogo lenirtemi, iba rara ajanga Khristan rejutem kanga takoksa nguogo, ta metetdaksü.

AICU-i Centre sorkar dang tiyongtsüi ia inyaksü, kiojen yangershiba nung yaritsü, teyari balala agütsütsü aser tensa azüoktsü mepishi.

Ano tribal nütsüing teimba aliba Meghalaya state nunga telok kari Khristan yimsü agizükertembo Scheduled Tribes nungi agientsü atema inyaksangshidar, ta AICU-i metetdaksü.

Ano Assam nunga 2024 küm agizükba Healing Practices Act kübok sarasadem sentongtem nokdang. Yaküm December ita nunga state nung aliba school ka nung Christmas benjung sübotsü raksaja liasü, ta AICU-i metetdaksü.

AICU Tir, Elias Vaz-i state ketdangsertem dang nütsüing ajema aliba tamangertem kümzüksü aser tamangba yimsü temeden akhümsübuttsü atema inyaksüla, ta

metetdaksü.

Tamalen AICU-i shidi ka ajanga Ato kilonser Narendra Modi danga 'Arunachal Pradesh Freedom of Religion Act of 1978' ya reprangshidaksüner ta mepishiogo.

Northeast nung aliba state tem- Arunachal Pradesh, Assam, Manipur, Meghalaya, Mizoram, Nagaland, Tripura aser Sikkim nung lisopur telok balala aser yimsü balala amangertem alir. Item state teimbaka nung Khristan nütsüing teimba lir aser Arogotemi schools aser healthcare centres lapoka aliba den külemi nübur tenzükba mapa aika inyaker.

ANOGO ABEN TSÜNGREM DEN

Temoatsü agizükba

"Koda, asenokbo Tsüngrem ket nungi tajung dang agizüker tamajungbo magizüksü asü?"

Yob 2:10

Aikati yob ji taremsük nisung ka ta bilemer. Saka iba dang nungi tali Pa lir. Pa rongsen tulu akaba nisung ka liasü. Pa tekümdang, mapa meranga inyakba, aser tashi angaba agi Tsüngremi Pa moatsü asü? Asenoki memetet, Pa san 7,000, ut 3,000, nashi pungchi 500, aser gado 500 liasu ta asenoki Yob kaket nungi angazüker (1:3). Pa ano sarasademba taküm ka liasü (1:5). Tsüngremi satan dang Pa akaba ajak aser chirtem agitsü temelaba agütsüra, Yob telangzübaji Pa tiyongtsü masü, saka tsüngrem tiyongtsü liasü: "Kibubai agütsü aser Kibubai bener aor.

Kibuba tenüing temoatsü süang" (1:21). Kodang Satani pa temang nung kongshi tebuttsüi Tsüngrem indang asüngdang. Yob telangzübaji Khristantem asoshi lesson tajung ka lir." Asenoki Tsüngrem nungi tajung dang agizüker tamajungba magizüksü asü?"Aikati Yisu Khrista Kibur aser Kümtetdakba ta agizükra timtem kecha agia matongtsü amai bilemer.

Saka shidakba nung yamaji masü. Ken kenbo asen tamang den mesütep ataloker.Pauli ashir, " Khrista nung temeshiba alitsü meranger ajak rishikangshitsü" (2 Tim 3:12). Tsüngremi asenok nem kanga moatsür aser Pa temoatsütemji ka ken ka ken ta züngdangbaji Khristan ka teinyaktsü lir. Asen tamang aser jakla Tsüngremi tendanger. Asenoki Pa temoatsütem agizükba ama Pai tentangbajia agizüksüla. Aser itemji ajanga otettsü asoshi asenoki Pa dak metaloka alitsüla.

Tsüngrem, Nai ni kanga moatsüogo. Ne temoatsütem agizükba ama Na nungi aruba tatitang agizüktettsü kü tamang ulua kümdakjang.

Iran nung Khristan lenirtemi tang aliba yimsüsürtem agientsü akhanger

February 26, 2026: Tawa Iran nung Khristan lenirtem aser Arogo nung lenirtem 200 dak temai sangdong ka nung sign süa tang Iran nung aliba yimsüsürtem ya menden nungi agientsüla, ta takhangba agütsüogo.

Taküm Iran nung nüburtemi yimsüsürtem anema longkak aitba mapang nung longkak aiter meyrjang aika tepsetogo. Anogo ishika tejaklen nungi tenzükba universities nung kaketshirtemia tang aliba yimsüsürtem anema longkak aitar.

Osangbenertem den jembidang Iran nung pastor, Robert-i, "Khristan ka ama ni nokdaksüsa akümer. Tang tashi nung nisung 30,000 nungi 90,000 tsüingda tepsetogo, anungji koba shidak mesüra koba tai, ta asüba nung shimtsüsa kecha mali. Iba dak alia tepuokdak balala nung alirtem dak kechi atalokdarar asenoki memetet. Yisui asenok dang sayuba ama tasü itta nokdaksüji kü mapa lir," ta

metetdaksü.

Pastor Robert ya küm 15 tashi Iran nung pastor inyaka aruogo, ajisüaka pai linük toktsüba sülen-a pai maneni Iran aser Afghanistan nung alirtem den külemi inyaksemer.

"Iba declaration nung sign asütsü atema ni shisadangba mapang nung ni, 'kü dak mesüra Iran nung aliba ozü kibong züngsemtem dak kechi ataloktsü?' ta bilema liasü. Ajisüaka ibaji ni asoshi dang bilemba ama akümer, kechiyong iba declaration ya ni asoshi dang masü," ta pastor Robert-i metetdaksü.

"Atangji ni-a tsübur saka tasü aittsü atema ni telemteba agir, kechiyong ni Iran nungertem den külemi nokdakner aser ola madoktetertem atema ola adoktsüner. Ibaji kü teinyaktsü shilem lir," ta pai metetdaksü.

Khristan lawyer, Attieh Fard-i ayongzuka Iran yimsüsürtem anema iba declaration ya renema liasü.

Iba declaration ajanga 'linük longjemtsü, lenirtemi khuret abentsü, tesünep alitsü, aser kijai yimsüsüba masü saka secular democratic yimtenren' atema takhangba agütsür.

Iba declaration ajangasa Iran nung yimten aser yimsü na pilatsü, ozüing kübok senso ajak kasa züngshitsü, yimsü, kin, atsüapong nung ajemdaker shinga mebendangtsü, yimsü temeden agütsütsü, yimtenren dak sendakba nung tepuokdak alir ajak chiochtsü aser Iran yimtenren latetba nung nüburtemi shilem agitsü atema akhanger.

Attieh Fard-i, "Iran nung Khristantemi küm jenti reshikangshi ajangshia aruogo. Ajisüaka joko Khristantemi ola madoki dangbo malitsü. Iba mapang ya asen linük puti otsü nung kanga tongtibang mapang ka asütsü aser Iran nung temelenshi adoktsü atema onoki ayongzük. Iran nungertemi alima nem pusemdaksüner," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Tzütsügnaro

(n) tzütsügnung nung tzü manung apungba naro (lotus)

* BJP teloki parnok telok tamaisü tzütsügnaro noksa amshir.

Tzütsürang

(n) tzü nung lia tekong nung entsü akoba tzürang (crocodile)

* Tzütsürang tetsüi entsü 30 dak tali akor.



OLONG PAITEP # 7427

Grid for OLONG PAITEP # 7427 with numbers 1-15 in various cells.

TIPILEN and LANGTSÜNGLEN lists for OLONG PAITEP # 7427.

OLONG PAITEP # 7426 TELANGZÜBA

TIPILEN and LANGTSÜNGLEN lists for OLONG PAITEP # 7426.

Tinsukia nung tribal teloktemi nagmati atutsü benokba magizük

Tinsukia, Tsüklai/February 26 (Agencies): North Eastern Coalfields (NEC)-i Tinsukia district, Margherita nung Lekhapani kübok Saliki yimtsügnung nung open-cast coal mining project ka atema benokba Tirap Tribal Belt nung kin balala tenügnung nokdakba lokti tentetemi anemogo. Iba ajanga lisopurtem ali temeden aser tzümpung aser arem shiruru amokmerener ta parnoki ashi. Osangbenertem den sensaksemba mapang kin balala nungi lenirtem den Saliki yimtsügnung nung alirtemi Coal India Limited indang subsidiary NEC, Margherita-i, iba mapang ajanga kongshitsü aliba yimdaklirtem den kanga junga ken o mashishitepi iba mapa tenzüksü asoshi renemba atema parnok aija liasü. Lenirtemi ashiba agi, iba mapang atema No Objection Certificate (NOC) ka Saliki nung alirtemi memeteti mesüra

parnok dang masügdangi Tirap Colliery Gaon Panchayat senden ka nung agizüka liasü. Parnoki ashiba agi, iba inyakyim ya iba tesem nung aliba lisopurtem tejangraba anema lir. All Assam Tangsa Students' Union tir Nayung Mossang-i ashiba agi, Singpho, Tangsa, Sema Naga aser Tai Phake aser Tai Khamti densema Tai oshi jembiba teloktem amala lisopurtem kümzüka ayutsü atema 1943 küm British nung yimsüsüba mapang Tirap Frontier Tract ya amenok aser headquarters ya Margherita nung amenoka liasü. Paisa, nüjiso anguba sülen Assam sorkari lisopurtem ali, sobaliba aser temden balala kümzüka toktsütsü nukjidong nung Tirap Frontier Tract nungja ya March 13, 1951 küm Tirap Tribal Belt agi melenja liasü. Pai ashiba agi, iba tesem ya North East Frontier Agency (NEFA) nung shilem ka liasü.

Tangkhul Naga Long-i Litan nung azütokshi lendong atalokba aitsü

Imphal, Tsüklai/February 26 (Agencies): Tangkhul Nagas nung lokti tentet tematiba Tangkhul Naga Long (TNL)-i, tawa Litan aser iba tesem temeket nung aliba Naga nung yimtsügnung nung Naga nung aser tetsütebou mapang nungi senmanga aruba ali dak rangloker azütokshi lendong bener arutsüba aitsüogo. TNL Working Committee-i Bodhbarnü sangdong ka ajanga ashiba agi, February 7 aonung Litan nung Tangkhul nung ka tepsettsü merangba nungi iba lendong atalok. Parnokisa, school tesayur Stalin A. Shimray dak pai kecha mashi sernung aonung 9:10 ako shi nung azük aser kanga mejungi yirutsü, ta ashi. Maneni iba lokti tentet yagi ashiba agi, February 8 nü Kuki nung telungpurtem Sikibung/Sharkaphung-i ai aser yimtsügnung tekolakbaer ki densema Tangkhul nung ki 23 dak tema rangtoktsü. Parnokisa, nisung aliba tesem len injang khaloktsü aser iba ajanga yimdaklirtem mesügnemteteti aküm, ta ashi. TNL-isa, February 23 nü mepetmesü adoka Lungter Hill Range kübok Sinakeithe yimtsügnung mi senokja liasü, ta ashi. Iba anogo yimdak lir Aseng Awungshi prangbong agi teneter pur ao aser ano ka tera agi dang jenboa liasü, ta parnokisa shisem. Iba tatalokba ya kanga süiki

ia bilemba TNL lemsatepogo, kechiyong prangbong hadir bener Suspension of Operations (SoO) cadre tem taoba anogo 18 tsüngda central security forces matsügdang senzüsenponger, koba parnoki ashiba agi, SoO tenangzüktepba anema lir. Parnokisa, SoO camp tem nung KNA(B) züngsemtem densema bendanger telungpurtem mungzüka lir, ta ashi. Central security forces inyakyim ashishiba mapang TNL-i ashiba agi, Naga nung aser parnok ki-o-jentem kümzüka yutsütsü melena force tem kari Kuki telungpurtem pusemer. Parnokisa, Naga nung lsiitü nung Kuki nung atema homeland/administration balaka tentettsütsü merangba atema Centre aitsüogo aser Naga nung aliba tesem nung inyaksangshi masütsü tekümdangtsü metetdaksüogo. Kasa sangdong ajanga ashiba agi, Litan/Litan Bazaar ya Sikibung/Sharkaphung yimtsügnung küboki aiter. Parnokisa, 2025 küm June ita 28 nü telongjem senden ka amen kong yimtsügnung tekolaktemi iba tesem ya Tangkhul nung meyong ta agizükogo aser Imphal-Ukhrul highway temeket yimjung nung toktsütsü mulungtepa liasü. Naga nungertemi Meitei aser Kuki nung tsüngda mangatettep adokba mapang

yimjung alitsü atema dang meranga aruogo aser humanitarian teyari agütsüogo, saka azütokshi lendong aiben atalokba aser nüburtem amokmerenba ajanga tesendaktep mejungi kümogo, ta TNL-i ashi. Lendong agi kongshir aliba tesemtem rongnung Litan Sareikhong, Mongkot Chepu, Yaolen, Shanghai, Zalenbung, Lamlai Chingphe aser Thawai Kuki/Sepiyang nung densema lir. TNL-i, Centre aser state sorkar dang SoO Kuki telungpurtem indang tesepe ya Naga nung aliba tesemtem nungi beneler aotsü aser ozügnung alema arur aliba bendangertem meyipa yoktsü mepeshia metetdaksüogo. Parnokisa, ozügnung alema ali atsünger alirtem mintoktsü aser ozügnung alema ali permit agizüker aliba thitsütsü aser Kuki nung alitsü atema permit tasen magütsütsü ayongzüko. Kasa mapang nung TNL-i Tangkhul nung yimdaklirtem dang Kuki nungertem den loktiliba aser rongsenketzügnung dak sendakba nung tesendaktep kecha mayutsü tetuyuba agütsüogo. Iba lokti tentet yagi ashiba agi, parnoki yimjung nung alitsü aser akhi ama tensa junga kümdaktsütsü pusemer, saka Naga nung ali temeden akoksa-abo iba amala yimjung ya mebenoktsü

Dima Hasao nung alirtemi Silchar-Saurashtra highway project sota ayu



Guwahati, Tsüklai/February 26 (Agencies): Assam kübok Dima Hasao district nung Dolai Chunga yimtsügnung nung alirtemi ali temenok magütsüba atema four-lane National Highway nung mapa anendaktsüba sülen Silchar-Saurashtra East-West Corridor yangluba nung maneni tetsükdaktsü adokogo. Anogo ishika tejakdang Dolai Chunga kübok Harangajao-Jatinga lenmang nung tang yanglua aliba flyover ka chirepba ajanga mapa nung tetsükdaktsü adokba sülen tang iba tetsükdaktsü ya adokogo. 2004 küm mapa tenzüka sülen aiben tetsükdaktsü ajangshia arudar. Northeast aser Western India sendaktepsü atema iba ya tongtibang lenmang ka lir, saka technical, administrative aser tanga tebilemstü balala ajanga küm metsü dak tema merenemteteti arudar. Chief Minister Himanta

Biswa Sarma-i tetuyuba agütsüba sülen Assam nung election atongtsü lia iba mapa tenzüksüshio. Ajisüaka Dolai Chunga nung alirtemi iba mapa sota ayu aser parnok nem ali atema temenok magütsü aliba khang liasü. Yimdaklirtemi ashiba agi, kibong 50 indang ki, ali aser tsünisenpongsütem raksatsüba asadangtsü atema 2025 küm November 26 nü joint survey ka agi. Iba inyakyim nung National Highways Authority of India (NHAI), Dima Hasao Land Revenue Department, North Cachar Hills Autonomous Council kübok Public Works Department aser Agriculture o Forest Department nungi ketdangsurtemi shilem agia liasü. Iba inyakyim benoka inyakba sülen compensation bill tem NHAI indang Silchar Project Implementation Unit (PIU) nem agüja liasü. Ajisüaka parnok nem tang

tashi temenok magütsü lir, ta yimdaklirtemi ashi. Yimdaklirtemi ashiba agi, highway atsülangshitsü atema ali talila agi aser iba ajanga kitem den külemi kozü aser süngjalijang tema alibattem raksatsüsa aküm. Parnokisa, State Ministers Kaushik Rai aser Nandita Garlosa nati January 31 nü iba tesem semdangba mapang yimdaklirtem dang iba inyakyim nung tetsükdaktsü magütsütsü mepeshi aser takaratiba nung temenok agütsütsü ta nangzüka liasü, ta ashi. Maneni kibongtem danga iba mapa tembanga inyaktsü atema parnok ki azügnungtsütsü shia liasü. Ajisüaka compensation file tem ya Silchar nung NHAI office nung bangdaka lir aser tang tashi senotsü kecha agüja mali. Yimdaklir kari ashiba agi, election atongtsü aliba agi iba mapa ya aritepa benoka inyaker. "Temenok magütsü tashi onoki mapa inyaktsü memelatsü," ta longkak aita aliba yimdaklirtemi ashi. Maneni yimdaklirtemi Dima Hasao district administration aser police dang mapa tenzüka inyakyonga aotsü atema parnok nem temenok takaratiba nung agütsütsü asoshi yaritsü mepeshia metetdaksüogo.

MASTER MEYACHIBA AIER
(LONGJANG)



02.12.1943 TO 13.02.2026

ONOKI TETI MEIMA ALIBA
ADIANU TSÜRAPUR TEMANG
MEJONGI SHIRANGBA MAPANG
NINGI TASÜBA ANOGO TASHI
TEMEIMER KWIKATI
SARASADEM, NÜBO, RONGSEN
ASER AKÜMETSÜBO AGÜJA
YARITEPOGO NENOK AJAK DANG
KANGA PELAR. TSÜNGREMI
NENOK AJAK MOJANG.
KINUNGERTEM

MENUNGRA BILEMTETER

TEMEIM KINUNGTSÜ
ASÜR LIMASUNGLA PONGEN (MEYILONG)



ASO : 1962 | ASÜ : 27-02-2025

Temeim kinungtsü, Na iba lima ya doktsür küm ka süigo saka onokibo anogo ka amai dang bilemer. Nu temeim aser sarasadem onoki kodanga mamateter.

TETI MEIMA ALIBA :-
Kinungbo, Chirnur Aser Semchir.

GOVERNMENT OF NAGALAND
INVESTMENT & DEVELOPMENT AUTHORITY OF NAGALAND (IDAN)
NAGALAND SKILL & ENTREPRENEURSHIP DEVELOPMENT MISSION (NSEDM)
NO. NSEDM-PMU/ESTT-3/1/2025 *Dated Kohima, the 27th Feb, 2026.*

ADVERTISEMENT
FREE SKILL DEVELOPMENT TRAINING OPPORTUNITIES

Sl. No.	Skilling Trade	Tentative start Month	Duration	Eligibility	Location
1	Certified Graphic Designing	March	1 Month	Basic Computer Knowledge	Kohima & Chuchuyimlang (Residential)
2	Foundation of Artificial Intelligence Technology	March	1 Month	10th Pass (Min)	Kohima (Residential)
3	Full Stack App Development	March	2 Months	Basic Programming Concepts	Kohima (Residential)
4	Pink Scooty (Two-Wheeler Training)	March	2 weeks	Only for Women (Self-Employment / Placement)	Kohima
5	Industrial Welder (Oil & Gas)	March & May	3 Months	18-30 Years	Guwahati (Residential)
6	Industrial Electrician	May	3 Months	18-30 Years	Guwahati (Residential)
7	RORT Solar Installer (Oil & Gas)	March & May	3 Months	18-30 Years	Guwahati (Residential)
8	Driving	March	1 Month	18-35 Years (Only for Dropouts / Self Employment / Placement in Driving Sector)	Dimapur, Kohima, Mon
9	Automotive Body & Repair Technician	March	2 Months	Open to all	Dimapur (Residential)
10	Automotive Electrician	March	2 Months	8th Pass (Min)	Dimapur (Residential)
11	Four-Wheeler Service Technician	March	2 Months	Open to all	Dimapur (Residential)
12	Solar Installation Technician	March	1 Month	8th Pass (18-35 Years)	Dimapur (Residential)
13	Data Analytics	March	2 Months	12th Pass (Min)	Dimapur
14	Accountancy	March	2 Months	12th Pass (Min)	Dimapur

* Residential indicates that the training programme includes free accommodation and meals for all candidates.

* Kindly note that all skill trainings are exclusively for self-employment and placement opportunities.

Eligibility : Open to all indigenous inhabitants of Nagaland.

- Training Benefits :
- ❖ Certified training by accredited institutions
 - ❖ Practical, hands-on experience
 - ❖ Placement Support



SCAN TO APPLY

Need Help? Contact us at : +916909465902
For more details, visit : nsedm.nagaland.gov.in
Follow us for updates : @nsedm_nagalandskillmission

Important Note : Applications will be screened on a first-come, first-served basis.
Early registration is highly encouraged.

Empowering youth through skills -
A step towards self-reliance and employment.

(MERIPENI NGULLIE)
PROJECT LEAD, NSEDM-PMU

MULUNGNEN O



ASO : 22.03.1995 - ASÜ : 13.02.2026

Onok Asoshi Milentong Teti Tatem Makadak Lir.

Onoki kodanga amatsü makokba asür Takotiba Jamir (Longmisa), meimlaba mapang ka nung iba lima nungi pila or aliba mapang ozü mangyim tejashi khuret nungita kija, lokti aser kibongtem shirnokisa sarasadem, shisatsü, nübu aser rongsen agi yariogo, nenok ajak dang pelaba den külemi ano tang aser teti temoatsü nung lidakjang ta ozüi sarasademtsür.

Onoki alakteta item kija aser lokti dang pelaba lemsateper;

1. Dr. S. C Jamir Ex. Cm & former Governor of Goa, Maharashtra, Gujarat & Odisha,
2. Shri. Tongpang Ozüküm, MLA & Advisor Water Resources Nagaland, Kohima,
3. Longmisa Baptist Arogo,
4. Longmisa Kaketshir Senden Riju,
5. Ao Students Conference (AKM)
6. Ongpangkong Student's Conference (OKM)
7. Ongpangkong Mungdang (OM),
8. Ongpangkong Tetsür Mungdang,
9. Dr. Aotemshi and Family, Straightway Christian Mission Centre,
10. Baptist School Longmisa,
11. Dimapur Longmisa Senso Telongjem,
12. Dimapur Longmisatsür Telongjem,
13. Tatsüngtet Zünga Longmisa,
14. LKSR Mokokchung Unit,
15. LKSR Kohima Unit,
16. LKSR Dimapur Unit,
17. Soyim Students Union,
18. Khensa Students Union,
19. Chungtia Students Union,
20. Settsü Kaketshir Telongjem,
21. Kupza Kaketshir Telongjem,
22. Kinunger Kaketshir Telongjem,
23. Mokokchung Senso Kaketshir Telongjem,
24. Aliba Kaketshir Telongjem,
25. Longsa Kaketshir Telongjem,
26. Chuchuyimpang Kaketshir Telongjem,
27. Delhi Ao Kaketshir Telongjem.

Temeim Tsürabur aser Adianu

US-i North Korea nuclear tashi agizüksüla: Kim Jong Un

Pyongyang, Tsüklai/February 26 (Agencies): North Korea lenir Kim Jong Un-i mera agitsü Washington nem nungloktsüogo aser United States-i North Korea ya nuclear tashi aliba linük ka ta agizüksüla, aji mesüra tatem maka tsükchitepa alitsü ta ashi.

Bodhbarnü Pyongyang nung Ninth Congress of the Workers' Party of the Democratic People's Republic of Korea nung jembidang, Kim-i US Tir Donald Trump nem tesendaktep atema mera agitsü tasak maongka ka agütsü.

"Constitution nung aliba ama US-i asen linük indang nuclear jenjang akumtsübora aser tsükchitepba tasa agienra,

kotaser asenoki United States den tesendaktep majungtsü," ta Kim-i ashi.

"Yimjung nung kati ka akumtsüboa alitsü mesüra teti raratepa alitsü atema asenok renema lir, aser ka shimtsü asen mapa masü."

Iba congress ya küm pongu nung khen alir, kong party delegates 5,000 shi adener aser Pyongyang nung aliba Kim Il Sung Square nung sepai 14,000 dak tema military parade ka nung shilem agia tembang.

Trump ya March ita tatemlen mesüra April ita tetenzüklen China-i aotsü imlar, aser iba mapang Kim den senden amentsü merangtsü akok. Taoba küm October ita Air

Force One nung mener osangbener den jembidang Trump-i, "Ni ajurutsü. Ni mulunga lir," ta ashi aser pa Kim den tesendaktep tajung lir ta shia liasü.

Taoba mapanga Trump-i iba ama senden amentsü pa noklang shilem renema lir ta ashi aser North Korea ya "nuclear power" mesük lir ta ashi.

Lenir ana ya tesüsa 2019 küm ajurutep saka sanction agientsü aser nuclear atsüanem akatsü onük nung opang mapu jembishiniü anen. Iba sülen küm trok dak tema nuclear ken o jembiba mali. Taoba küm US tir-i South Korea semdangba mapang Kim-i senzüka yutsü.

(Maneni tapak 8 nung...)

Cristiano Ronaldo-i UD Almeria nung 25% stake alizükogo



Tsüklai/February 26, 2026 (Agencies): Portugal nung nungtungu asayar Cristiano Ronaldo-i UD Almeria nung 25% stake alizüka iba iba club kiburtem rongnung ka kümogo. Iba tenangzüktepba ya CR7 Sports Investments ajanga yangluogo, koba pa indang company CR7 SA nung shilem ka lir. Iba tenangzüktepba yangluba sülen arishi küm 41 tain asayar ya iba Spain indang club indang kibur rongnung ka kümogo. Club-i iba osang ya X ajanga metetdakja liasü. "Cristiano Ronaldo-i UD Almeria nung invest süogo aser

SMC Group-i aniba club ownership consortium nung pa shilem ka kümogo," ta club sangdong ka ajanga metetdaksü. Almeria ya Spain south len amenoka lir aser parnok tang Segunda Division nung tasembuba jenjang nung lir aser automatic promotion spots atema point ana dang nungdaker. Parnok ya 2023/24 season nung relegate asüba sülen La Liga-i meyipa arutsü atema ana nung lir. Iba club ya Mohamed Al Khereiji-i anir Saudi investment telok kati alizükba sülen küm ka lir tang Ronaldo-i iba jenjang

agiogo. Mohamed Al Khereiji tena kanga junga sendaktepa lir aser pai teyari agüja Ronaldo ya Al-Nassr nung oa dena liasü. Club tir Al Khereiji-i Portugal nung nungtungu asayar ya pelashishia agizükogo. "Cristiano-i onok indang club nung invest asütsü shimba atema onok kanga pelar. Pa ya iba asaya asayaba asayartem rongnung tajungtiba ka ta züngshir. Pai Spanish football kanga junga meteta lir aser onoki tang team aser academy yanglua aliba ya renloka aotsü asoshi lenmang koda sadema lapoka ali aji pai angateter," ta pai ashi. Ronaldo-i football asaya nungdang masü saka iba asaya tarutsü jenjang yanglushitsüsü atema tejangraba aliba lemsatepa aruogo. "Asayaba moapu nung dang masü saka iba ya adena or-a football asaya atema teyari agütsütsü mapang talangka nungi kü nukjidong liasü. UD Almeria ya Spanish club ka aser parnok tatemdakdak kanga takang lir aser renloka aotsü lenmang sadema lapoka lir," ta Ronaldo-i ashi. "Ni lenirtem den inyaka club terenlok asoshi teyari agütsütsü yongyaseta atar," ta paisa shisem.

T20 World Cup: South Africa-i wicket 9 agi West Indies kokogo

Tsüklai/February 26, 2026 (Agencies): Brehostibarnü tang asaya aliba T20 World Cup super 8 nung South Africa-i wicket teku agi West Indies koka parnok iba asayamung khen danga tamakok mongui asaya arudar. Iba asaya nung South Africa captain Aiden Markram-i out mesüi ball 46 nung run 82 yanglua team len ania liasü. Pai four tenet aser six pezü züka South Africa-i ball 23 anunga lia run 177 yangluba nung teyari tulu agütsü. Super 8s nung parnok Group 1 nung temaba jenjang nung lir aser semi-finals-i aitsü ana nung lir. Arishi küm 31 tain asayar shibai ball 27 nung half-century yanglu pai Quinton de Kock (47 off 24) den senteper run 95 yanglu. Iba sülen Quinton ya Roston Chase-i out süja liasü. Ryan Rickelton-ia out mesüi ball 28 nung run 45 yanglua liasü. West Indies pur batting amenba mapang powerplay nung asayar pezü out asüba den asayar 7 out ser run 83 dang yanglur liasü aser South Africa asoshi run arishitsü ishika dang asütsü ta bilema

liasü. Ajisüaka Romario Shepherd aser Jason Holder na senteper run 89 yanglua West Indies-i run 170 dak tema yangluba nung teyari agütsü. Spinner Keshav Maharaj indang mezüngbuba over nung run 17 yangluba sülen West Indies pur ball 11 tsüngda asayar pezü out asü. Kagiso Rabada aser Lungi Ngidi nati wicket anana agia liasü. Sherfane Rutherford shiba run asem yanglur aliba mapang out asütsü nungi jenboa liasü, paia junga masayateti out süatok aser pa sülen Rovman Powell, aser Matthew Forde nata kanga kara out süatok. Iba sülen Shepherd aser Holder na over 11buba nungi külemi batting amen tenzük. Mapang tatsüka süngjema asayaba sülen asayar na yagi over 15buba nungi ball kanga junga züka asaya tenzük aser Shepherd-i ball 37 nung run 52 aser Holder-i ball 31 nung run 49 yanglua liasü. Tenati tatembangbuba over pongu nung run 58 yanglu, kong over 18buba nung Holder-i Marco Jansen-i ball aonba mapang run 23 yangluba densema lir.

Champions League: PSG aser Real Madrid na round of 16-i iogo

Tsüklai/February 26, 2026 (Agencies): Taoba season Champions League koker aliba Paris St-Germain team-i Monaco koka parnok round of 16 tongtetogo. Asaya nung Monaco-i asaya mezüngbuba shilem nung Maghnes Akliouche ajanga mezüngbuba goal idaktsü aser parnokisa tanabuba goal idaktsür lila, saka Coulibaly-i metsüba ball bar adena ao. Ajisüaka asaya nung Coulibaly-i Achraf Hakimi alangdakja pa red card chir tuguba sülen asaya melenshia liasü. Iba sülen mapang tatsüka

dang lir Marquinhos-i goal ka idakja goal kasasa aküm. Maneni minute 66buba nung Kvaratskhelia-i PSG atema tanabuba goal idakja liasü. Mapang apuloktsür asayaba mapang Jordan Teze-i Monaco atema goal ka idaktsü saka parnok asoshi aji teperi masü asü. PSG pur taruba asaya Chelsea mesüra Barcelona den asayatsü. Kasa mapang nung Real Madrid-ia Benfica koka round of 16 tongtetogo. Iba takok ya racism anema nokdakertem ajak atema takok ka lir ta midfielder Aurelien

Tchouameni-i ashi. Mezübuba leg nung Benfica nungi asayar Gianluca Prestianni-i Vinicius Jr tiluja liasü. Iba asaya nung Vinicius kijai goal ka idakja liasü. Iba sülen Prestianni-i pa aitsüba magizük saka asaya ka atema tenokdangba agütsü aser iba ajanga pa Bodhbarnü asaya nung masayatet. Asaya nung Benfica puri mezüngbuba goal idaktsü saka Real Madrid-i meyipa aruru goal 2-1 agi asaya koka liasü. Asaya nung tanabuba goal ya Vinicius-i idakja liasü. Real-i iba asaya ya aggregate nung 3-1 agi koka round of 16-i iogo.

BENDANGLI OSANG : Tapak 7 nungi...

US-i North Korea nuclear tashi...
Kim-i tang tesüsa jembiba ajanga pai nok-nü indang mejembitsü ta sayur. North Korea nung nuclear warheads 50 shi lir aser ano 40 yanglutsü oset lir, ta taoba küm Stockholm International Peace Research Institute (SIPRI) ajanga asadanteta liasü. US den jembishinü akatsü asoshi teimla tera sayuaka Kim-i South Korea tsütsü kishi shibang. Pyongyang-i "compatriots" category nungi South Korea teti asoshi agentsü aser parnok ya North asoshi tamajungtiba entity ka lir ta pai ashi. "Asen den arütsü süa ali tashi South Korea-i geopolitical tensa nungi mejentetsü, aser tetsübo makai alitsü lenmang ajak agi asen dak sendakba ajunga yutsür asenok kisüng yutsütsüla," ta Kim-i ashi. South Korea Tir Lee Jae Myung-i tesendaktep

yanglushitsü meranga arur aser propaganda drone flights anendaktsü aser UN Security Council ajanga humanitarian aid nokdanga aliba lapokdaktsütsü meranger. North Korea-i 2024 küm par constitution nung South Korea ya tsükchir linük ka lir ta inoka liasü. Kim-isa par linük indang nuclear tashi maneni yanglutsü nangzüka liasü. "Asenoki nuclear weapons timba kumdaktsütsü projects nung rangloktsü aser asen nuclear inyakyim ulushitsü," ta pai ashi. Russia den North Korea tesendaktep tajungba akumba ajanga Kim yimli ya rongsen lenmang aser nok-nü yangluba nung mongintem ajangzük aser linük balala dak metaloka aliba ajemer aser sanctions agüja aliba nung anisüngzük agütsütsü mechi nuclear sentong yutsütsü tejangraba mali.

J&K nung 'Winter Sports' Centre Of Excellence amenoktsü

Tsüklai/February 26, 2026 (Agencies): Union Sports Minister Mansukh Mandaviya-i Brehostibarnü sangdong ka ajanga, winter sports atema National Centre of Excellence ka Jammu and Kashmir nung amenoktsü ta metetdaksüba den taruba Khelo India Winter Games ya anogo 15 asayaba benjung ka kumdaktsütsü, ta shisem. Gulmarg nung Khelo India Winter Games tanabuba leg shibangba sentong nung o

jembiba mapang Mandaviya-i, iba tesem ya world-class winter sports destination ka kumdaktsütsü atema Centre nukla aliba lemsatep. "Kashmir lima nung lenmang aika sadema lapoka lir. Idaki National Centre of Excellence ka amenoktsü. Gulmarg ya tarutsü nung Winter Sports atema global hub ka asütsü," ta pai ashi. "Winter Games ya anogo pezü dangbo masayatsü. Tourisem den bendenloka onoki

anogo 15 asayaba Winter Games ka ayongzüktsü, kong Fit India Carnival, sobaliba sentongtem aser tetoktepba balala densema alitsü," ta pai shisem. Iba Centre of Excellence ya Bengaluru nung amendaka aliba Board of Control for Cricket in India (BCCI) indang institution den kasa asütsü masütsü mejangja. High-class facility tem ya timba cricket asayartemi amshir saka iba centre ya tanga asayartemia amshitetsü.

BILEMDANGANG
"Merangdang takok mongura tesasa kecha mali."